

2 Tesalonaika

Yesu pi wel wiak kutömweri sëen wë krismaki 20 pöta ök won sëen Poolök Korin kak wë pep epwer Tesalonaika ingre moröröaan kaalak retëng ë mena. Pi kat wiin pit kön irikor äak Kristoë kaalak waisëpna pöt yok oröa pël wesa pöt kat wiak wotpil wasëpënëak pim waisëpnaata ngönte kaalak retëng ë mena.

Pöt epël wia.

Ngön ngës räaut 1:1-2

Yoöre ërëp ngönte 1:3-12

Kristoë kaalak waisëpnaata ngönte 2:1-17

Kristoë kentöökë ënëm ëëpenaat 3:1-15

Ngön mëet 3:16-18

1 O Tesalonaika kak ingre mor saurö, ne Pool Sailasre Timotiiring wë pep epwer retëng ë yaningk. Pöt Anutu tiarim Pepapre tiarim Aköp Yesu Kristo wë pötaanök.

²Anutu tiarim Pepapre tiarim Aköp Yesu Kristo piarpim komre kolapre mayaap pöt ningkën arim naë wiaap.

Pool pi Anutuun yoöre ërëp mëä

³Karurö, akun poutë ten arimëen yak Anutuun yoöre ërëp maim wëen pangk yaë. Arim kön wi kosang yewesaut kosang panë yesën neneraan lup sant yaalmëan pöt kaö yes pötaanök. ⁴Pël yeë pötaan ten arim yapinte wak isak Anutuu ingre mor saö ka nantë wëauröen ök yemak. Arim kööre toköröak utpet yaalniin këlangön kat yawiem lup kosang sak wë kön wi kosang yewesaut taë wes wak wë.

Anutuuk tiar wotpil wesak wël äak ya yanimëngk

⁵Arim wëwë pitak Anutuuk wël äak ya yamëngkaut wotpilte pöt pet yaalni. Ar wëwë ompyaö pipët wak wëen arën kön wiak wa ngaöök nimëëpnaataan këlangön kat wiinëak niia. ⁶Anutu pimtök wotpil wesak ya mënak omën këlangön kat yaniwi pörö kangiir këlangön kat mowiiipnaat. ⁷Pël äak ar këlangön kat yawi pörö puot kërë niolaan tenring ompyaö eim öpenaat. Pim pël ëëpna pöt tiarim Aköp Yesu Kristo

kutömwer sêp wesak es kêsang newesring tekeri yaaröön pim ensel weëre kosang pöröa piiring waisêpnaatak pël êëpnaat. ⁸Pël êak omên Anutuun köpël wê tiarim Aköp Yesu pim ngön ompyaut ngaarêk naön yaë pörö puuk kangut mampnaarö. ⁹Omên pörö pit Anutuuk kangut menak waö ë momëên Aköpë ëöetak wêaut sêp wesak pim weëre kosangöökë ëwaaten itnaangkên sasa kö sêpnaarö. ¹⁰Pim waisêpna akun pötak omên pim yapinte wak isak aimeë kön wi kosang wesak wêa pörö piin yaya mapnaat. Ën arta tenim ngönën ök niaut kön wi kosang wesan pötaanök pitëm tekarak önëët.

**Pool puuk Tesalonaika omnarö Anutuuk weëre
kosang mampënëak kimang mëä**

¹¹Ar pël ëënë pötaanök ten akun poutë Anutuuk kaamök elniipënëak kimang yamëäurö. Wëwë önëak yas niia pöt pi arën kön wiin ompyaö wëên pangk êëpënëak kimang yamëëan. Pël yeem pi weëre kosang ningkên arim kentöök omên ompyaut pout ëënëak kön yawi pöt ëëre arim ya Kristoon kön wi kosang weseë yamëngk pötta pet irö pël ëënëak kimang yamëëan. ¹²Pël yeem ar tiarim Aköp Yesu Kristoë yapinte wak isak aim wëên puukta arën tapël wak isak apënëak kimang yamëëan. Tiarim Anuture Aköp Yesu Kristo piaripök komre kolap elniin pël ëënëët.

Omên ngön wa yoolëaupë ngönte

2 ¹Karurö, tiarim Aköp Yesu Kristo kaalak waisën piiring wa top ëëpena ngönte kosang wesak epël nianaan kat wieë. ²Omên narök Aköp kaalak waisa ngön pöt yaan kat wiak kön irikor êak ya ngës ëënganok. Ngön kaar pöt omên nampök tektek ngön yaauröa ök sak niia ma nampök pimtë könöokaan rëak niia ma narök, “Pool puuk retëng êak wes momëên kat wia,” pël ök niia wes. ³Omên namp kaar ke pilöt ök yeniaan pöt kat mowiinganok. Aköpë waisêpna akunet pas naarööpan. Wet rëak omên kêsang Anutuu ngönte wa olëak pi kasëng meneim wëënak omên Anutuu ngönte wa olaima pöp utpet mowesak es parëaöökë ping mowasêpnaap pi tekeri sëënak ënëmak Aköpë akunet orööpnaat. ⁴Pi omên pouröa Aköp pël sêpënëak pitëm omnant Anutuu ök yewesaare ngëëngk wesak yaya yamëëa pötön kööre tok elmëëpnaat. Pi pimtën ne Omp Aköp pël aö omnaröa yaya yamëëa pötë rangk isak Anutuu ngönën tup kaöeta kakaati ilëak wel aisëëë pimtën, “Ne Anutu tapöp,” pël apnaat.

⁵Ne ngaantak arring wë ngön pöt ök niaimaut. Pöt ar kat kolak wë ma? ⁶Peene omên utpet pöp waisêpënëak yaëën omnant il wariak wë pöten ar ëwat wë. Ënëmak Anutuu pimëën akun mowia piptak tekeri orööpnaap. ⁷Ar ëwat wë. Peene wëwë Anutuu ngön wa yoolëa pöt kot wiaan omên narök pël yaë. Pël yaëën omên utpet pöt kot yewesa pöp om kot wesak wë

ënemak sêpnaap. ⁸Pël ëen omën Anutuu ngönte wa olaima pöp tekeri oröön utpet pöt kaö panë sêen Aköp Yesu wais pim këm muntönöök momöön wel wiipnaap. Pim waisêpnaatak ëwa pööring oröön omën pöp kö sêpnaap. ⁹Omën Anutuu ngönte wa olaima pöp Setenë weëre kosangöök wais morök elniipênëak ya weëre kosang ke nentere nent mênak retêng it ngolöpöt mëmpnaat. ¹⁰Pël yeem pi Setenë weëre kosangöök omën kö sêpna pörö morök elmëêpnaat. Omën pörö Anutuuk utpetetakaan kama moöpênëak pim ngön kêët öpênëak maan kaaö ëa pötaanök kö sêpnaarö. ¹¹Pit pim ngön kêëten kaaö ëa pötaanök Anutuuk omën kaar nantëen wa yaap wesak kön wi kosang wasêpna yak omën weëre kosang nent pitëm naë wes mëen orök morök elmëêpnaat. ¹²Pötaanök omën ngön kêëten kön wi kosang newasën utpetatëen kentre kaur eima pörö Anutuuk kangut mampnaat.

Anutuuk ar utpetetakaan kama niöpênëak yaö elnia

¹³Tenim kar Aköpë lup sant yaalni pörö, ten arimëen yak Anutuun yoöre ërêp maim wë. Ngaan panëer Anutuuk ar utpetetakaan kama niöpênëak yaö niia. Pël ëen pim Pulöök ar Anutu pimtëen omën panë sênëak niulëen ngön kêëten kön wi kosang wesan pötaanök utpetetakaan kama niwa. ¹⁴Anutuuk ar utpetetakaan kama niöpênëak ngön ompyaut tenim arën ök niia pötak yas niia. Pöt ar tiarim Aköp Yesu Kristooring ëwaatak wë pim omën ompyaut ngawi eim önëak niia. ¹⁵Pötaanök karurö ar kosang sak tauëë Anutuu ngönënte tenim këmötök rë nuulööre pepatë ök niiaö pël elnieima pötë ënëm ëeim ön.

¹⁶Tiarim Aköp Yesu Kristoore Anutu tiarim Pepap, piaripök lup sant elnia. Pël ëak komre kolap yaalniem arim lupöt kosang nuweseim öpnaat. Pël ëen omën ompyaö piarpim nimpna pötëen kangk eim wë. ¹⁷Piaripök arim lupre könöt kosang nuwesak omën ompyautëen aöre mëmpö pël ëenëen weëre kosang nimp.

Poolök, “Anutuun ten kaamök elniipnaan kimang maë,” pël mëëa

3 ¹Karurö, ten ngön munt nent wia. Pöt epët. Ar Anutuun ten kaamök elniin ya mëngkën Aköpë ngönte arim naë ëa pöl teentom ulöl sêen onnarö wak ping wesak apënaan kimang man. ²Omën selap pan Kristoon kön wi kosang newasën wë. Pötaanök Anutuuk ten utpetaröa moresiaan kama nuupnaan kaalak kimang man. ³Pit piin kön wi kosang newasën yaëetak Aköp pi ya ompyaö yamëngkën tiar piin kön wi kosang wasëpena pöt pangk ëêpnaat. Pi Setenök utpet niwaspanëen weëre kosang nimpnaat. ⁴Aköpök ten könre lupöt kosang niwasën tenök arimëen kön kosang yawi. Ten arën epël kön yawi. Tenim ngön kosang wesak ök yeniak pöt ar peeneaan ënëma poutë om eim önëët. ⁵Aköpök arim lupötë ya yanimëngkën Anutuu arën lup sant yaalni pötëre Kristoë kosang sak tauëë könömöt wak wakaima pötenta ëwat sën.

Poolök omën pourö ya mëmpënëak mëëa

⁶Karurö, ten tiarim Aköp Yesu Kristoë urtak wë kosang wesak epël ök yeniak. Kar narö tenim ngönën ök niia pöta ënëm naën wisën wë pörö mop mowieë. ⁷Ar ëwat wë. Tenim yaaul ök ëënëët. Ten ngaantak arring wë wisën naën eimaut. ⁸Akun pötak ten arim moresiaan këëre kaömpöt pas naön eimaut. Arim naëaan pas önganëak sum pëënë ëak önëak këtëkre rö kan poutë ya kosang mëneimaut. ⁹Tenim arim naë ya mëneimaö pötak ar këëre kaömp nimpunëak kimang niianëën pangk ëan tapön. Pël ëaatak ten pël naën ar tenim ënëm ëënëëk yak tenimtok këëre kaömp öna yaat mëneimaut. ¹⁰Ngaant tenim arring wakaima pöten ar ëwat wë. Pötak nga ngön nent epël ök niiaut. Omën namp ya namëngkën ëëpna pöp kaömp mangkan.

¹¹Pöt oröptaanök ngön pöt niian wasngan. Ten kat wiin epël aim. Omën arim teköökkan narö ya namëngkën wisën wë kar naröa omnantëën ngön pas köntak yamëëan pël ya. ¹²Ten Aköp Yesu Kristoë urtak omën piporöen ngön kosang wesak epël yeniak. Ar ëlëp wal ë rëak wë arimtëën ompyaö wesak ya yamëngkem këëre kaömp wak neim weë.

¹³Pël wia pötaan, karurö ar ompyaö yaautaan kaaöre këëpöt ëënganok. ¹⁴Omën namp tenim ngön pep epweri retëng ë yaningk epot ngaarëk naön yaëën pöt ëö sëpnaan war wes mëak kërë momëën. ¹⁵Pël yeem piin kön wiak arim kööre toköp pël wasnganok, won. Arök piin kön wiin arim kar namp pël sëën pepanöm man.

Ngön mëët

¹⁶Aköp, mayaap pepap, pimtok omën ke nentere nent yaaröön mayaap nineim öp. Pi tapöpök ar pouröa naë öp.

¹⁷Ne Pool tapöpök arën yoöre ërëp epët nemtë moresök retëng yeë. Mor retëng epët nemtëët. Nem pep poutë yaaulök arimëenta yeë.

¹⁸Tiarim Aköp Yesu Kristoë komre kolap pöt arim naë wiaap.

[Yok pi tapët.

Ne arim nanëp, Pool.]